

CONVENIO DE COLABORACIÓN ENTRE A UNIVERSIDADE DE SANTIAGO DE COMPOSTELA, A UNIVERSIDADE DA CORUÑA, A UNIVERSIDADE DE VIGO E O INSTITUTO GALEGO DE ESTATÍSTICA PARA A REALIZACIÓN DE PRÁCTICAS DE ESTUDANTES DO MASTER UNIVERSITARIO EN TÉCNICAS ESTATÍSTICAS

REUNIDOS

Dunha parte, D. Antonio López Díaz, Reitor Magnífico da **Universidade de Santiago de Compostela**, con CIF Q1518001A, actuando en nome e representación dela en virtude do nomeamento efectuado por Decreto 57/2018, do 31 de maio (DOG nº 106, do 5 de xuño de 2018), e polas facultades conferidas pola Lei Orgánica 6/2001, do 21 de decembro, de Universidades e o Decreto 14/2014, do 30 de xaneiro, polo que se aproban os estatutos da Universidade de Santiago de Compostela.

Doutra parte, D. Julio Ernesto Abalde Alonso, Reitor Magnífico da **Universidade da Coruña**, con CIF Q6550005J, actuando en nome e representación dela e en virtude do nomeamento efectuado por Decreto 5/2020, do 9 de xaneiro (DOG nº 7, do 13 de xaneiro de 2020), e polas facultades conferidas pola Lei Orgánica 6/2001, do 21 de decembro, de Universidades e o Decreto 101/2004, do 13 de maio, polo que se aproban os estatutos da Universidade da Coruña.

Doutra parte, D. Manuel Joaquín Reigosa Roger, Reitor Magnífico da **Universidade de Vigo**, con CIF Q8650002B, actuando en nome e representación dela e en virtude do nomeamento efectuado por Decreto 59/2018, do 31 de maio (DOG nº 109, do 8 de xuño de 2018), e polas facultades conferidas pola Lei Orgánica 6/2001, do 21 de decembro, de Universidades e o Decreto 13/2019, do 24 de xaneiro, polo que se aproban os estatutos da Universidade de Vigo.

E doutra parte, D. José Antonio Campo Andión, Director do **Instituto Galego de Estatística**, con CIF S6500005A, actuando en nome e representación del en virtude do nomeamento efectuado por Decreto 295/2009, do 14 de maio (DOG nº 94, do 15 de maio de 2009), e polas facultades conferidas pola Lei 9/1988, do 19 de xullo, de estatística de Galicia e o Decreto 60/2016, do 26 de maio, polo que se aproba o estatuto do Instituto Galego de Estatística.

Todos eles, en virtude de poderes suficientes ou capacidades, que manifestan non lles foron modificados nin revogados para comparecer neste acto e vincularse.

Todas as partes recoñécense plena capacidade e lexitimación bastante para formalizar o presente convenio e aos efectos

EXPOÑEN

Primeiro.- A adecuación dos programas educativos ás necesidades do mundo empresarial constitúe unha das preocupacións das universidades galegas.

Segundo.- O complemento que para a formación do estudante supón o coñecemento da realidade empresarial no ámbito das ensinanzas teóricas que se lle imparten é un dos obxectivos que as universidades do Sistema Universitario de Galicia (en adiante SUG) consideran de maior importancia.

Terceiro.- A realización de prácticas de estudantes das universidades galegas é unha das tarefas encomendadas ao Instituto Galego de Estatística (en adiante IGE) nos seus plans anuais de actuación, que se desenvolven segundo o previsto no Decreto 60/2016, do 26 de maio, polo que se aproba o seu estatuto.

Cuarto.- Todas as partes consideran necesario un maior acercamento entre o ámbito empresarial e as universidades, co obxecto de facilitar a futura inserción laboral dos universitarios mediante a alternancia da súa formación teórica con prácticas de empresa, acadando ao mesmo tempo a mellor cualificación e futura adaptación aos postos de traballo demandados polas empresas.

Quinto.- Todo isto evidencia a necesidade dun convenio que enmarque a cooperación educativa entre os asinantes e delimite as garantías recíprocas dos estudantes e o IGE no desenvolvemento do período de prácticas.

En consecuencia, acordan formalizar o presente convenio de colaboración a teor das seguintes.

CLÁUSULAS

PRIMEIRA. OBXECTO

As partes asinantes acordan establecer un programa para que os estudantes realicen prácticas profesionais nas instalacións do IGE, así como para achegar persoas expertas para aquela parte da docencia teórico-práctica especializada que fose precisa.

A través do presente convenio fíxanse as pautas e mecanismos de colaboración entre as partes, coa finalidade de establecer unha adecuada programación, desenvolvemento e verificación da colaboración.

SEGUNDA. DOCENCIA TEÓRICO-PRÁCTICA E PRÁCTICAS TUTELADAS

O proxecto formativo das prácticas especificase no Anexo I do convenio.

TERCEIRA. TITORES/AS

Designaranse dúas persoas como titoras do estudante, unha por cada parte asinante do convenio, cuxas misións serán seguir e supervisar a realización das prácticas.

CUARTA. NÚMERO DE PRAZAS DE ESTUDANTES

O IGE acollerá 1 estudante por cada curso académico.

QUINTA. RÉXIME XURÍDICO DA REALIZACIÓN DAS PRÁCTICAS

As prácticas académicas externas levaranse a cabo de acordo coas seguintes normas:

a) Persoas destinatarias

Poderán participar nas prácticas os estudantes do Máster Universitario en Técnicas Estatísticas.

b) Período

O tempo de realización de prácticas tuteladas no IGE será acorde co número de horas recollido no plan de estudo correspondente, sen superar as 225 horas.

c) Dereitos e obrigas da persoa designada como titora polo IGE

Dereitos:

- Ao recoñecemento pola universidade da súa actividade colaboradora, en forma de certificado de docencia, de ser requirido por ela.
- A ser informada acerca da normativa que regula as prácticas externas, así como do proxecto formativo (guía docente da materia) e das condicións do seu desenvolvemento.
- A ter acceso á universidade para obter a información e o apoio necesarios para cumprir os fines propios da súa función.

Deberes:

- Acolle ao estudante e organizar as actividades a desenvolver, de acordo ao establecido no proxecto formativo.
- Supervisar as actividades das prácticas e orientar e controlar o seu desenvolvemento cunha relación baseada no respecto mutuo e no compromiso coa aprendizaxe.
- Informar ao estudante da organización e funcionamento do IGE e da normativa de interese, especialmente da relativa á seguridade e riscos laborais.
- Coordinar coa persoa designada pola universidade como titora académica o desenvolvemento das actividades establecidas, incluíndo aquelas modificacións do

proxecto formativo que poidan ser necesarias para o normal desenvolvemento das prácticas, así como comunicar e resolver as posibles incidencias e controlar os permisos do estudante para realizar exames.

- Proporcionar a formación complementaria que precise o estudante para realizar as prácticas.
- Proporcionar ao estudante os medios materiais indispensables para desenvolver as prácticas.
- Facilitar e estimular a achega de propostas de innovación, mellora e emprendemento por parte do estudante.
- Facilitarlle á persoa designada como titora académica pola universidade o acceso ao IGE para cumprir os fines propios da súa función.
- Gardar confidencialidade en relación con calquera información que coñeza do estudante como consecuencia da súa actividade titorial.
- Prestar axuda e asistencia ao estudante durante a súa estadía no IGE, para resolver aquelas cuestións de carácter profesional que poida necesitar no desempeño das actividades que realice na mesma.
- Emitir un informe sobre o desenvolvemento e resultados das prácticas.

d) Contido das prácticas

O contido das prácticas adaptaranse ao proxecto formativo do Anexo I do convenio e tratará de proporcionar ao estudante unha visión global do IGE, a través dos seus departamentos.

As persoas designadas como titoras, a coordinadora do máster e o estudante asinarán o documento do Anexo II, no que se concretan as tarefas a desenvolver e o período das prácticas.

e) Memoria das prácticas

Ao rematar o período de prácticas cada estudante deberá elaborar unha memoria final sobre o traballo desenvolvido.

f) Procedemento de avaliación

A avaliación final das prácticas será realizada polas universidades, tendo en conta a memoria elaborada polo estudante e o informe de prácticas do IGE.

g) Certificación do IGE

No caso de que o informe e a avaliación da memoria sexan favorables, o IGE emitíralle ao estudante unha certificación na que deben constar o tempo de colaboración e as actividades, traballos, investigacións, etc. realizados.

A certificación deberá especificar que carece de efectos académicos e que, para estes efectos, queda supeditada á avaliación que realicen as universidades asinantes das prácticas.

h) Efectos

A realización das prácticas tuteladas poderá supoñer o recoñecemento de créditos prácticos necesarios para obter os títulos correspondentes, segundo a convocatoria específica de cada curso.

i) Relación co IGE

Os estudantes en prácticas non terán, en ningún caso, vinculación laboral co IGE, nin esta a consideración de contrato en prácticas, de aprendizaxe, a tempo parcial ou calquera outra modalidade existente.

Os estudantes non poderán realizar tarefas de responsabilidade no IGE, nin (polo menos en solitario) as exclusivas do seu persoal, estando sempre e en todo caso orientadas as prácticas a unha aprendizaxe práctica titorizada.

k) Dereitos e obrigas dos estudantes

Dereitos:

- Á tutela, durante o período de duración das prácticas, dun profesor da universidade e dun profesional que preste servizos no IGE.
- Á avaliación de acordo cos criterios establecidos polas universidades asinantes.
- A recibir do IGE información da normativa sobre seguridade e prevención de riscos laborais.
- A cumprir coas súas actividades académicas, formativas, de representación e de participación, previa comunicación ao IGE coa suficiente antelación.
- No caso de estudantes con discapacidade, a dispor dos recursos necesarios para acceder á tutela, á información, á avaliación e ao desenvolvemento das prácticas en igualdade de

condicións, así como a poder conciliar as prácticas coas actividades e situacións persoais derivadas ou conectadas coa súa situación.

- Aqueles outros dereitos previstos na normativa vixente.

Obrigas:

- Cumprir a normativa vixente relativa ás prácticas externas establecida polas universidades.
- Coñecer e cumprir o proxecto formativo das prácticas, seguindo as indicacións da persoa titora do IGE e baixo a supervisión da titora académica da universidade.
- Manter contacto coa persoa titora académica durante o desenvolvemento das prácticas, comunicarlle calquera incidencia que poida xurdir no mesmo e entregarlle os documentos que lle sexan requiridos, o informe emitido polo IGE e a memorias das prácticas.
- Incorporarse ao IGE na data acordada, asumindo os gastos de desprazamento, cumprir o horario previsto no proxecto formativo e respectar as normas de funcionamento, seguridade e prevención de riscos laborais do IGE.
- Aplicar o proxecto formativo e cumprir con dilixencia as actividades acordadas co IGE conforme ás liñas establecidas nel.
- Gardar a confidencialidade e o segredo estatístico en relación coa información do IGE, durante a súa estadía e finalizada esta.
- Mostrar, en todo momento, unha actitude respectuosa coa política do IGE, salvagardando o bo nome da universidade á que pertence.
- Elaborar a memoria final das prácticas.
- Calquera outro deber previsto na normativa vixente.

I) Seguridade do estudante e responsabilidade civil

Os riscos de enfermidade ou accidente estarán cubertos polo seguro escolar para estudantes menores de vinte e oito anos. A cobertura para os maiores de vinte e oito anos rexerase polo establecido para o efecto en cada universidade.

A cobertura dos riscos derivados da responsabilidade civil do estudante queda garantida polas universidades do SUG.

SEXTA. COMPETENCIAS DAS UNIVERSIDADES

A selección de estudantes será competencia das universidades.

SÉTIMA. COMISIÓN DE SEGUIMIENTO E INTERPRETACIÓN

Créase unha comisión de seguimento e interpretación do convenio integrada por parte das universidades asinantes pola persoa que coordina o máster, ou na que delegue, e por parte do IGE pola titular da subdirección de quen dependa o servizo no que o estudante realice as prácticas.

A comisión terá as seguintes competencias en relación ás prácticas tuteladas:

- Resolver os problemas que se susciten na súa execución.
- Interpretar e aplicar, con carácter xeral, as estipulacións do convenio, así como controlar o seu cumprimento e resolver os conflitos entre as partes.
- Tomar medidas en relación coas incidencias que xurdan na realización das prácticas, incluída a expulsión de estudantes que non cumpran as cláusulas do convenio.

A comisión reunirse cando así o considere necesario calquera das partes.

OITAVA. NORMAS DE APLICACIÓN SUPLETORIAS

Ao presente convenio seralle aplicable subsidiariamente a seguinte normativa:

- I. Real Decreto 1393/2007, do 29 de outubro, polo que se establece a ordenación dos ensinos universitarios
- II. Normativa de prácticas académicas externas das universidades asinantes.
- III. Normativa do plan de estudos da titulación.
- IV. Real Decreto 592/2014 de 11 xullo polo que se regulan as prácticas académicas de estudantes universitarios.

NOVENA. DURACIÓN

O convenio terá efectos a partir do día seguinte á súa sinatura. Subsidiariamente, se a sinatura fose dixitalizada e non coincidisen as datas das partes, tomarase como data de referencia a da derradeira sinatura.

O convenio terá unha vixencia de catro anos. No entanto, antes de rematar o prazo previsto e se as circunstancias o aconsellan, as partes poderán acordar por unanimidade a súa prórroga,

polo período estritamente necesario e sempre dentro do límite máximo de catro anos adicionais establecido na Lei 40/2015, de 1 de outubro, de réxime xurídico do sector público.

En todo caso, non se poderá rescindir mentres existan estudantes realizando prácticas.

DÉCIMA. RESOLUCIÓN

Serán causa de resolución do convenio:

- O mutuo acordo das partes.
- O incumprimento das súas cláusulas, previa reunión da comisión de seguimento e interpretación.

UNDÉCIMA. PROTECCION DE DATOS

As partes comprométense a cumprir o establecido no *Regulamento (UE) 2016/679 do Parlamento Europeo e do Consello, de 27 de abril de 2016, relativo á protección de datos das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos)*, así como na *Lei orgánica 3/2018, de 5 de decembro, de protección de datos persoais e garantía dos dereitos dixitais* e no resto da lexislación española aplicable nesta materia.

O estudante en prácticas que por mor das actividades formativas teñan acceso, en calquera fase do seu tratamento, a información de carácter persoal ou sometida ao segredo estatístico non a revelará a ninguén alieo ao IGE, nin a utilizará ou disporá dela dun xeito ou con finalidades distintas ás esixidas polas accións formativas, obriga que subsistirá aínda despois de rematadas as mesmas, respondendo en caso de incumprimento do deber de segredo fronte ao IGE, sen prexuízo das responsabilidades que por igual causa puideran derivarse ante a Axencia Española de Protección de Datos.

A tal efecto o estudante asinará o documento do Anexo III, no que se obriga a cumprir o deber de segredo estatístico regulado na Lei 9/1988, do 19 de xullo, de estatística de Galicia.

DUODÉCIMA. PUBLICIDADE E REXISTRO

A sinatura deste convenio leva implícito o consentimento expreso das persoas intervenientes para que a Administración pública autonómica galega poida facer públicos os datos de carácter persoal e calquera outras especificacións que figuren nel, de acordo co disposto na Lei 19/2013, do 9 de decembro, de transparencia, acceso á información pública e bo goberno, e na Lei galega 1/2016, do 18 de xaneiro, de transparencia e bo goberno.

O presente convenio será inscrito no rexistro de convenios da Xunta de Galicia, nos termos previstos no Decreto 126/2006, do 20 de xullo.

DECIMO TERCEIRA. CONDICIÓN DE RESCISIÓN DAS PRÁCTICAS

O incumprimento por parte do estudante das súas obrigas ante o IGE poderá determinar a perda automática dos seus dereitos como estudante en prácticas.

DÉCIMO CUARTA. XURISDICION

As partes comprométense a resolver amigablemente as diferenzas que puideran xurdir a través da comisión de seguimento e interpretación do convenio.

Non entanto, recoñécese a xurisdición contencioso-administrativa como competente na materia, dada a natureza pública dos asinantes do convenio.

Pola Universidade de Santiago de Compostela
D. Antonio López Díaz
Reitor

Pola Universidade de Vigo
D. Manuel Joaquín Reigosa Roger
Reitor

Pola Universidade da Coruña
D. Julio Ernesto Abalde Alonso
Reitor

Polo Instituto Galego de Estatística
D. José Antonio Campo Andión
Director

ANEXO I. PROXECTO FORMATIVO: GUÍA DA MATERIA

Prácticas en Empresa do Traballo Fin de Máster do Máster en Técnicas Estatísticas		
Créditos	15 ECTS	Traballo Tutelado
Período de realización	Segundo curso, primeiro cuadrimestre	
Competencias básicas	CB6. Posuír e comprender coñecementos que proporcionen unha base ou oportunidade para ser orixinal no desenvolvemento e/ou aplicación de ideas, a miúdo nun contexto de investigación científica e tecnolóxica altamente especializado. CB7. Saber aplicar os coñecementos avanzados adquiridos, integrándoos na resolución de problemas en contornos novos ou pouco coñecidos dentro de contextos máis amplos (ou multidisciplinares) relacionados coa súa área de estudo. CB8. Adquirir coñecementos que lle permitan afrontar, de xeito independente, a formulación de xuízos baseados en información que, sendo incompleta ou limitada, inclúa reflexións sobre as responsabilidades sociais e éticas vinculadas á aplicación dos seus coñecementos e xuízos. CB9. Saber comunicar as súas conclusións e os últimos coñecementos e razóns que os apoian a audiencias especializadas e non especializadas, dun xeito claro e inequívoco. CB10. Posuír as habilidades de aprendizaxe que lle permitan seguir estudando dun xeito que terá que ser, en gran medida, auto dirixido ou autónomo.	
Competencias xerais	CX1. Coñecer, comprender e saber aplicar os principios, metodoloxías e novas tecnoloxías en estatística e investigación operativa en contextos científicos/académicos, tecnolóxicos ou especializados e multidisciplinares, así como adquirir as habilidades e competencias descritas nos obxectivos xerais da titulación. CX2. Desenvolver autonomía para identificar, modelar e resolver problemas complexos de estatísticas e investigacións operativas en contextos científicos/académicos, tecnolóxicos ou especializados e multidisciplinares. CX3. Desenvolver a capacidade para realizar estudos e tarefas de investigación e transmitir os resultados a públicos especializados, académicos e xerais. CX4. Integrar coñecementos avanzados e afrontar a toma de decisións baseada en información científica e técnica. CX5. Desenvolver a capacidade de aplicar algoritmos e técnicas para resolver problemas complexos no campo da estatística e da investigación operativa, empregando o software especializado apropiado.	

Competencias transversais	CT1. Desenvolver fortes habilidades de razoamento, análise crítico e autocrítico, así como argumentación e síntese, en contextos especializados e multidisciplinares. CT2. Desenvolver habilidades avanzadas na xestión das tecnoloxías da información e as comunicacións (TIC), tanto para obter información como para divulgar coñecemento, nun ámbito científico/académico, tecnolóxico ou profesional especializado e multidisciplinar. CT3. Ser capaz de resolver problemas complexos en novos contornos mediante a aplicación integrada de coñecemento. CT4. Desenvolver unha sólida capacidade de organización e planificación do estudo, asumindo a responsabilidade do seu propio desenvolvemento profesional, para o traballo en equipo e de forma autónoma. CT5. Desenvolver capacidades para a aprendizaxe e a integración no traballo en equipos multidisciplinares, nos ámbitos científico/académico, tecnolóxico e profesional.
Competencias específicas	CE1. Coñecer, identificar, modelar, estudar e resolver problemas complexos de investigación estatística e operativa, nun contexto científico, tecnolóxico ou profesional, derivado de aplicacións reais. CE2. Desenvolver a autonomía para a resolución práctica de problemas complexos derivados de aplicacións reais e para a interpretación de resultados co fin de axudar na toma de decisións. CE3. Adquirir coñecementos avanzados dos fundamentos teóricos que están detrás das diferentes metodoloxías da estatística e da investigación operativa, que permitan o seu desenvolvemento profesional especializado. CE4. Adquirir as habilidades necesarias na xestión teórico-práctica da teoría de probabilidades e variables aleatorias, que permitan o seu desenvolvemento profesional no campo científico/académico, tecnolóxico ou especializado e multidisciplinar. CE5. Afondar no coñecemento dos fundamentos teórico-prácticos especializados na modelización e no estudo dos diferentes tipos de relacións de dependencia entre variables estatísticas. CE6. Adquirir coñecementos teórico-prácticos avanzados de diferentes técnicas matemáticas, especificamente orientadas á axuda na toma de decisións, e desenvolver a capacidade de reflexión para avaliar e decidir entre diferentes perspectivas en contextos complexos. CE7. Adquirir coñecementos teórico-prácticos avanzados de diferentes técnicas de optimización matemática, tanto en contextos dunha soa persoa como de varias, e saber aplicalos con suficiente autonomía nun contexto científico, tecnolóxico ou profesional. CE8. Adquirir coñecementos teórico-prácticos avanzados de técnicas para facer inferencias e contrastes relacionados con variables e parámetros dun

	modelo estatístico, e saber aplicalos con suficiente autonomía nun contexto científico, tecnolóxico ou profesional. CE9. Coñecer e saber aplicar de forma autónoma en contextos científicos, tecnolóxicos ou profesionais, técnicas de aprendizaxe automática e técnicas de análise de datos de alta dimensión (big data). CE10. Adquirir coñecementos avanzados sobre metodoloxías para obter e procesar datos de diferentes fontes, como enquisas, internet ou contornos "na nube".
Actividades formativas	Clases expositivas: 10h. Realización e exposición do traballo: 240h.
Metodoloxía da ensinanza	Realizar un traballo para que o estudante analice e estude problemas da área da estatística e investigación operativa nos que estean interesados as empresas ou entidades colaboradoras. O traballo realizado debe estar relacionado con algunha das técnicas da estatística e/ou da investigación operativa estudadas no máster en técnicas estatísticas. A realización de prácticas nunha empresa ou institución é unha das modalidades que contempla o máster en técnicas estatísticas para o terceiro cuatrimestre do seu programa formativo. As prácticas requiren dunha persoa titora dentro da empresa ou institución, que debe estar apoiada por un profesor ou profesora do persoal docente do propio máster. Tamén requiren a sinatura do presente convenio e unha ficha específica para cada proposta de traballo, na que se faga constar, como mínimo, o nome e dirección da empresa, o nome da persoa titora e a súa relación coa empresa, o cometido do alumno e o número de horas que dedicará, e que non deberá ser inferior a 225 horas.
Avaliación	O estudante que escolla a modalidade de prácticas en empresa ou institución defenderá o seu traballo ante un tribunal, previa entrega dunha memoria das actividades levadas a cabo. Independentemente do tipo de traballo, correspóndelle ao estudante enviar o seu TFM en formato electrónico ao coordinador do máster e confirmar a correcta recepción do mesmo. A lingua empregada na devandita obra (e na súa defensa) será o galego, o español, o inglés ou o portugués.
Recursos de aprendizaxe	Os propios da empresa ou institución e os habituais para realizar TFMs no máster en técnicas estatísticas.
Contidos mínimos	O TFM é obrigatorio para todos os estudantes, podendo escoller entre dúas modalidades A) Traballo teórico ou aplicado; B) Traballo dentro dunha empresa ou institución. De escoller a modalidade B, o estudante realizará un traballo dentro dunha empresa ou institución para analizar e estudar problemas da área de estatística e investigación operativa relacionados con algunha das técnicas estatísticas ou de investigación operativa estudadas no máster.

ANEXO II. FICHA ESPECÍFICA DAS PRÁCTICAS

As persoas que asinan este documento manifestan que leron e aceptan as condicións e compromisos establecidos no convenio de colaboración educativa subscrito entre a Universidade de Santiago de Compostela, a Universidade da Coruña, a Universidade de Vigo e o Instituto Galego de Estatística, para a realización de prácticas de estudantes do máster universitario en técnicas estatísticas

CURSO 202.../202...

1. Tipo de prácticas: Traballo fin do máster. universitario en técnicas estatísticas

2. Estudiante beneficiario/a:

Apelidos e nome

DNI

O estudante declara cumprir os requisitos establecidos no convenio para realizar as prácticas, así como estar ao corrente no pagamento do seguro establecido na cláusula 5.m): seguro escolar para menores de 28 anos e seguro específico para maiores de 28 anos.

3. Centro de traballo e localidade onde se desenvolverán as actividades:

4. Persoa titora académica:

D/Dona

con DNI

Posto de traballo:

4. Persoa titora do IGE:

D/Dona

con DNI

Posto de traballo

5. Duración: do (dd/mm/aaaa).ao (dd/mm/aaaa). Nº total de días: Horas/día:

6. Réxime de permisos: Será acordado entre o IGE e o estudante e adaptase ás normas que as universidades poidan establecer. En todo caso, o IGE respectará as obrigas de asistir á universidade para cumprir as actividades académicas, formativas, de representación e de participación do estudante.

7. Obxectivo educativo: Que o estudante aplique e complemente os coñecementos adquiridos na súa formación académica, favorecendo a adquisición de competencias que o preparen para exercer actividades profesionais, que faciliten a súa empregabilidade e que fomenten a súa capacidade de emprendemento.

8. Actividades a desenvolver acordes co proxecto formativo do máster:

.....
.....

.....

9. Sistema de avaliación e control: A persoa designada como titora académica, á vista do informe do IGE e da memoria final do estudante, avaliará as prácticas desenvolvidas de acordo co previsto na normativa universitaria de aplicación.

10. O estudante comprométese a cumprir coas obrigas establecidas no convenio e deberá:

- Incorporarse ao IGE na data acordada e cumprir o horario previsto.
- Cumprir e respectar o sistema organizativo do IGE.
- Gardar o debido coidado respecto dos asuntos que coñeza na súa tarefa.
- Cumprir e respectar as normas de seguridade e prevención de riscos laborais do IGE.
- Cumprir con dilixencia e boa fe as actividades acordadas co IGE.
- Cumprir calquera outro deber previsto na normativa vixente.

O que se asina, por cuadruplicado, en Santiago de Compostela, o de de 20..

O/A titor/a académico/a, Asinado:	O/A titor/a do IGE Asinado:
O/A coordinador/a do máster Asinado:	O/A estudante Asinado:

ANEXO III. COMPROMISO SOBRE SEGREDO ESTATÍSTICO

A Lei 9/1988, do 19 de xullo, de estatística de Galicia (LEG) regula o deber do segredo estatístico e establece que:

- Serán obxecto de protección e quedarán amparados polo segredo estatístico todos os datos de persoas físicas e xurídicas.
- O segredo estatístico amparará os datos individuais de orde privada, persoal, familiar, económica ou financeira, utilizados para elaborar estatísticas, que non se poderán facer públicos nin comunicar a ningunha persoa ou entidade.
- O segredo estatístico vulnérase pola comunicación directa de datos e pola comunicación de datos dos que se poida deducir razoablemente información individual.
- As persoas que interveñan nas operacións reguladas pola LEG están obrigadas a manter o segredo estatístico, aínda logo de concluír as súas actividades profesionais e a súa vinculación cos servizos estatísticos.
- O deber de segredo estatístico empeza desde o momento no que se facilita a información por el amparada e ten unha duración de cen anos.
- O incumprimento do deber de segredo estatístico dará lugar ás responsabilidades indemnizadoras dos danos e prexuízos causados, nos termos establecidos no ordenamento xurídico, con independencia das responsabilidades penais e disciplinarias previstas.
- Considérase infracción administrativa moi graves difundir ou comunicar a persoas non autorizadas datos individuais amparados polo segredo estatístico, ou datos dos que se poida deducir información confidencial sobre datos persoais.
- As infraccións graves sancionaranse con multa de 2501 a 10000 euros. Se a persoa infractora obtivese un beneficio económico superior aos 10000 euros, a multa pode chegar ata o dobre do beneficio obtido.
- As sancións administrativas non son obstáculo para esixir responsabilidades aos infractores perante as xurisdicións ordinaria ou contencioso-administrativa.

En virtude do anterior, eu,
con DNI, estudante do máster universitario en técnicas estatísticas, como participante no programa de prácticas externas no IGE comprométome a cumprir o deber do segredo estatístico.

Santiago de Compostela, de de